

ԼՈՒՐԵՐ

ԼԻԲԱՆԱՆ ԸՆՏՐԱԿԱՆ ՏԱՐԻՔԸ ՆՈՒԱԶԵՑՆԵԼՈՒ ՕՐԻՆԱԳԻԾԸ ԶԱԽՈՂԵՑԱԻ

Լիբանանեան խորհրդարանը Երկուշաբթի հրաւիրուեցաւ քուէարկելու ընտրական տարիքը 18-ի նուազեցնելու օրինագիծը:

Այս օրինագիծը հաստատուելու համար անհրաժեշտ էր, որ խորհրդարանի անդամներուն երկու երրորդը քուէարկէր ի նպաստ օրինագիծին: Քաղաքական հոսանքներէն շատեր օրինագիծին դէմ վերապահութիւններ չունենալով հանդերձ իրենց վերապահութիւնը արտայայտեցին՝ ներկայ հանգրուանին գայն ներկայացնելու իմաստով եւ յատկապէս առանձին, այսինքն՝ արտերկրի լիբանանցիներուն քուէարկելու իրաւասութիւն շնորհող օրինագիծին բացակայութեան:

Խորհրդարանի նախագահ Նեպիհ Պըրրիի կողմէ քուէարկութեան դրուեցաւ ընտրական տարիքը 18-ի նուազեցնելու օրինագիծը: 66 երեսփոխաններ մնացին ձեռնպահ, երեսփոխան Սերժ Թուրաթիանեան քուէարկեց օրինագիծին դէմ, իսկ 34 երեսփոխաններ՝ ի նպաստ օրինագիծին:

«Դեմոկրատական հանդիպում» խորհրդարանական խմբաւորումի անդամ Մարուան Համատէ դիտել տրւաւ, որ ընտրական տարիքը 18-ի նուազեցնելու օրինագիծը՝ արտերկրի լիբանանցիներուն ընտրելու իրաւասութիւն շնորհելու օրինագիծէն անջատ քուէարկելու քայլը Նեպիհ Պըրրիի կողմէ թույլ տրուած լուրջ սխալ մըն է: Համատէ առաջարկեց մէկ քանի ամիսով չեղարկել քուէարկութիւնը, որպէսզի հնարաւոր ըլլար արտերկրի լիբանանցիներուն քուէարկելու իրաւունք շնորհող բանաձեւին հետ համատեղ քուէարկել գայն:

«Բարգաւաճում եւ ազատագրութիւն» «Հաւատարմութիւն դիմադրութեան», Ընկերվար Յառաջդիմական կուսակցութիւնը եւ երեսփոխաններ՝ Իմէտ Ալ Հուր, Նիքոլա Ֆաթուշ, Թամամ Սալամ, Ահմէտ Քարամէ, Նեժիպ Միքաթի, Մուհամմէտ Սաֆարի եւ Քասն Ապտէլ Ազիզ քուէարկեցին ի նպաստ օրինագիծին:

Խորհրդարանը նաեւ ընտրեց նախագահներ, նախարարներ դատող գերագոյն խորհուրդի անդամները՝ Իպրահիմ Քանաան, Նիքոլա Ֆաթուշ, Սամիր Ճըսր, Ղազի Ջըպլէր, Նիքոլա Պըսըն, Մուհամմէտ Ֆընէյշ, ընկեր Սեպուհ Գալիփաքեան: Ապա տեղի ունեցաւ փոխ-անդամներու ընտրութիւնը՝ Նուար Սահելի, Նէյլա Թուէյնի եւ Մարուան Համատէ:

ԼԻԲԱՆԱՆԱՅԱՅԵՐԸ ԲԱՅԱՏՐՈՒԹԻՒՆ ԿԸ ՊԱՅԱՆՁԵՆ ԻՐԵՆՑ ԱՐՏԱՔԻՆ ԳՈՐԾՈՑ ՆԱԽԱՐԱՐԵՆ

Լիբանանի արտաքին գործոց նախարար Ալի Շէմիին ատրպէյճանական Trend գործակալութեան տուած իր հարցազրոյցի ընթացքին յայտարարած է, որ պաշտօնական Պէյրութը Լեռնային Ղարաբաղի հակամարտութեան կարգաւորման գործով կը պաշտպանէ Ատրպէյճանի տարածքային ամբողջականութիւնը: Այս յայտարարութիւնը արդարացի վրդովմունք առաջացուցած է Լիբանանի հոծ հայկական համայնքէն նորս եւ Սոցիալ Դեմոկրատ Հնչակեան կուսակցութեան Լիբանանի շրջանի ղեկավարութեան միջոցաւ յայտարարութիւն տարածած է, զարմանք արտայայտելով արտաքին գործոց նախարարի յայտարարութեան վերաբերեալ:

ՀԱՂՈՐԴԱԳՐՈՒԹԻՒՆ

Լիբանանի արտաքին գործոց նախարար Ալի Շէմիի՝ ազերիական «Թրէնտ Նիուզ» լրատուական գործակալութեան հետ ունեցած հարցազրոյցը կ'ընդգրկէ բաւական վիճելի արտայայտութիւններ:

Ըստ «Թրէնտ Նիուզ» գործակալութեան կողմէ լոյս ընծայուած հարցազրոյցին, մեծարգոյ նախարարը ըսած է, թէ Լիբանան իր գորակցութիւնը կ'արտայայտէ Ատրպէյճանի հողային ամբողջականութեան, կը յարգէ անոր գերիշխանութիւնը եւ միջազգայինօրէն ճանչցուած անոր սահմանները, ու մեկնելով այս իրողութենէն կառչած կը մնայ հակամարտութիւններու լուծման միջազգային օրինականութեան տուեալներուն:

Յարգելի նախարարը նաեւ կը յայտնէ հակամարտութիւնները ու վիճելի հարցերը երկխօսութեան եւ միջազգային օրինականութեան սկզբունքներու հիման վրայ լուծելու անհրաժեշտութիւնը:

Կ'ուզենք մեծարգոյ նախարարին ուշադրութեան յանձնել՝ «Թրէնտ Նիուզ» գործակալութեան լոյս ընծայած հարցազրոյցի արաբերէն եւ անգլերէն բնագիրներուն միջեւ գոյութիւն ունեցող բացայայտ տարբերութիւնը, որ ընթերցողը շփոթի կը մատնէ՝ նախարարին վերաբերելով հայկական ուժերու կողմէ ազերիական հողեր »գրաւելու« մասին յայտարարութիւն մը:


Այս առիթով, կ'ուզենք յարգարժան նախարարին եւ հանրային կարծիքին ուշադրութեան յանձնել, թէ անցեալ դարու 20-ական թուականներու սկիզբը, Ստալինի կամայական մէկ որոշումին հետեւանքով, Լեռնային Ղարաբաղի տարածութիւնը բռնօրէն կցուեցաւ Ատրպէյճանին: Հակառակ յանրապետական քաղաքական, մշակութային, ցեղային բնութիւններուն եւ խորակամութեան, Լեռնային Ղարաբաղի ժողովուրդը պահպանեց իր ինքնուրոյնութիւնը եւ խորհրդային Միութեան քայքայումէն ետք ան հռչակեց իր անկախութիւնը:

Կը փափաքինք նաեւ մեծարգոյ նախարարին ուշադրութեան յանձնել, թէ Լեռնային Ղարաբաղի հակամարտութեան կարգաւորման նպատակով կազմուած է ԵԱՀԿ-ի Մինսքի խմբակը՝ Ռուսիոյ, Ֆրանսայի եւ Միացեալ Նահանգներու համանախագահութեամբ:

Վստահ ենք, որ ազերիական գործակալութիւնը խեղաթիւրած է մեծարգոյ նախարարին յայտարարութիւնը՝ պատմական իրողութիւնները շրջանցելով հանրային կարծիքը մոլորեցնելու ակնյայտ դիտաւորութեամբ:

Ս.Գ.Հ.Կ. ԼԻԲԱՆԱՆԻ ՇՐՋԱՆԻ ՎԱՐԻՉ ՄԱՐՄԻՆ ՓԵՏՐՈՒԱՐ 18, 2010

ԹՈՒՐԲԻԱՅԻ ՄԷՋ ԿԸ ՇԱՐՈՒՆԱԿՈՒԻՆ ԶԵՐԲԱԿԱԼՈՒԱԾ ՊԱՇՏՕՆԱԹՈՂ ԶԻՆՈՒՈՐԱԿԱՆՆԵՐՈՒ ՀԱՐՑԱՔՆՆՈՒԹԻՒՆՆԵՐԸ



Ստամպուլի դատարանը այսօր ամոզ օրուան ընթացքին կը շարունակէ հարցաքննել Երկուշաբթի լուսադէմին ձերբակալուած պաշտօնաթող զինուորականներուն: Զօրացուած գեներալներուն, ծովակալներուն եւ գնդապետներուն ոստիկանութիւնը ձերբակալեց չորս մեծ քաղաքներու մէջ՝ Անքարայի, Ստամպուլի, Պուրսայի եւ Իզմիրի իրականացուած գործողութեան ընթացքին: Ձերբակալուածներու մէջ կան ռազմածովային եւ ռազմաօդային ուժերու նախկին հրամանատարները, Ստամպուլի տեղակալուած 1-ին բանակի նախկին հրամանատարը:

Ոստիկանութիւնը կը պնդէ, որ զինուորականները 2003-ին ռազմական յեղաշրջում կը ծրագրէին նպատակ ունենալով տապալել էրտոյանի կառավարութիւնը: Այս ծրագրով կը նախատեսուէր երկրին մէջ քառասյին իրավիճակ ստեղծել՝ բանակի միջամտութիւնն ապահովելու համար: Մասնաւորապէս, պէտք է պայթեցուէին Ստամպուլի մզկիթներէն մի քանին, արհեստականօրէն պիտի սրուէին յարաբերութիւնները հարեւան Յունաստանի հետ: Իրենք՝ ձերբակալուած զինուորականները, կը պնդեն, որ որպէս յեղաշրջման ծրագիր ներկայացուող փաստաթուղթերը իրականութեան մէջ զօրավար-

ժուլիւններու ծրագիր էին: Hurrieyt Daily News թերթի մեկնաբան Օզգուր Օզրիթի խօսքով. - «Վերջին մէկ ամսուան ընթացքին մենք անընդհատ նոյն բանը կը լսենք, այս սպային ձերբակալած են, միւսին հարցաքննած, խուզարկուած է Զինուած ուժերու գաղտնի հրամանատարական կէտը: Առաջին անգամ Թուրքիայի հանրապետութեան պատմութեան մէջ նման իրադարձութիւններու ականատեսը կը դառնանք: Որեւէ մէկը Թուրքիայի մէջ ի վիճակի չէ կանխատեսել, թէ ի վերջոյ այս ամէնը ինչ աւարտ կ'ունենայ:

Անոր կարծիքով, վերջին ձերբակալութիւնները որոշակիօրէն կը տարբերին «էրգենեկոնի» գործէն:

«Երբ կը հետաքննուէր «էրգենեկոն» ցանցի գործունէութիւնը՝ մարդիկ իրաւացիօրէն կը տարակուսէին. եթէ այդ կազմակերպութիւնը յեղաշրջում կը նախապատրաստէր, ապա ինչու բացառապէս լրագրողներ ու համալսարաններու դասախօսներ կը կախաւորուէին: Հանրութիւնը չէր հասկնար՝ իսկ որտեղ են այն զինուորականները, որ պէտք է իրագործէին յեղաշրջումը: Այս վերջին ձերբակալութիւններով կարծես ամէն ինչ իր տեղը կ'իջնան, եւ հետաքննութիւնը որոշակի իմաստ ձեռք կը բերէ», - կը նշէ Օզրիթը:

ՖՐԱՆՍԱՅԻ ՎԱՐՉԱՊԵՏ ՖՐԱՆՍՈՒԱ ՖԻՈՆ ԴԱՄԱՍԿՈՍ ԱՅՅԵԼԵՑ

Ֆրանսայի վարչապետ Ֆրանսուա Ֆիոն աւարտեց Սուրիա կատարած իր երկօրեայ այցելութիւնը: Ֆիոն հանդիպում մը ունեցաւ նախագահ Պաշար Ասատի հետ եւ քննարկեց երկու երկիրներուն միջեւ տնտեսական, առեւտրական եւ արհեստագիտական յարաբերութիւնները զարգացնելու միջոցները, ինչպէս նաեւ Միջին Արեւելքի խաղաղութեան գործընթացը: Նախագահ Ասատ իր Ֆրանսայի հիւրին ուշադրութեան յանձնեց, որ խաղաղութեան հասնելու համար Իսրայէլ պարտաւոր է գործադրելու միջազգային ընտանիքին պահանջները՝ հեռանալ բռնագրաւած հողերէն եւ ճանչնալ պաղեստինցիներուն ազգային ինքնորոշման իրաւունքը: Ասատ դրուատեց խաղաղութեան հասնելու Ֆրանսայի թափած ճիգերը, ընդգծելով, որ խաղաղութեան գործընթացը կը պահանջէ իսկական կամք եւ յանձնառութիւն:

Իր կարգին, Ֆիոն վեր առաւ շրջանային փոխյարաբերութիւններուն մէջ Սուրիոյ ունեցած առանցքային դերակատարութիւնը:

ՍՈՒՐԻՈՅ ՄԷՋ ՀԱՄԸՆԴՀԱՆՈՒՐ ՀԱՄԱՆԵՐՈՒՄ ՅԱՅՏԱՐԱՐՈՒԱԾ Է

Այսօր Սուրիայի մէջ համընդհանուր համաներում յայտարարուած է: Ինչպէս կը հաղորդէ սուրիական ՍԱՆԱ գործակալութիւնը, երկրի նախագահ Պաշար Ասատի կողմէն ստորագրուած հրամանագիրը կը տարածուի անոնց վրայ, որոնք յանցագործութիւն կատարած են մինչեւ 2010 թուականի Փետրուարի 23-ը: Համաներման մասին հրամանագիրը, որ չի վերաբերի ծանր յանցագործութիւններ կատարելու համար դատապարտուածներուն, կը գուզադիպի մահմետական աշխարհի մէջ նշուող Մուհամմէտ մարգարէի ծննդեան օրուան տօնին: Այս նախագահ Ասատի կողմէն յայտարարուած համաներման առաջին հրամանագիրը չէ այն ժամանակէն, երբ ան իշխանութեան եկաւ 2000 թուականի Յունիսին: